

Число 21.

Ужгород, 1. листопада 1923.

Рочник III.

# ВЛАХОВІСТНИК

ДУХОВНА ГАЗЕТА ДЛЯ ПОДКАРПАТСКИХ РУСИНОВ

Выходить двараз в мѣсяцъ  
каждого 1-го и 15-го.

АДРЕС:  
редакції и експедиції:  
REDAKCIJA „VLAHOVISTNIK“  
Užhorod, Kapitulska, 3.

ПРЕДІЛАТА:  
на рок ..... 12.— К  
одно число ..... — .60 К  
За границу ..... 20 . К  
До Америки..... 1 Д.

ОБЯВЛЕНИЯ  
принимаются по цѣнѣ  
за 1 сторону .. 200 К  
за 1/2 сторону .. 120 К  
за 1/4 сторону .. 65 К

## „Горѣ имѣмъ сердца!“

Теперь въ осени, зовсѣмъ смутнѣ суть хмары. Сонце не свѣтить такъ сильно. Жовтое листя деревъ покрыває землю. Изъ квѣтокъ спадуть лепестки. Въ лѣсахъ и загородахъ не звучить радостный голосъ спѣвающихъ потять. Природа приклон голову на довгій сон... Природа умирає...

И въ нашомъ житю прииде разъ сіе время. И мы будеме мати такой вѣкъ скорше або позднѣйше — коли посѣдѣ наше волося и изморщиться лице, коли выгасне огонь нашихъ очей, и помали лишать насъ наши силы... Уснеме, умреме.

То не можно затаити, что сесе смуткомъ наповнить наше сердце и слезами очи наши. Но мы, истиннѣ вѣрники Іисуса Христа не маеме причину на смутокъ. Мы знаеме, что наша смерть лише сномъ, по которому знову выступиме изъ темного гроба, чтобы'сьме могли еще свѣтлѣйше, славнѣйше жити дале въ вѣчномъ блаженствѣ...

Се буде наша весна, наша ярь. Въ яри оживе природа. Яне зеленѣти повсюду. Въ лѣсахъ, загородахъ между корчами восклікнє веселый голосъ птаховъ... квѣтки выпхаютъ свои прекраснѣ головки, як бы лиш то хотѣли проповѣдати, что за сномъ, за смертю е живот; новый, красный, веселый, щастливый животъ.


Сякъ живеме и мы. Не будьме смутнѣ также. Въ толпахъ святыхъ мартироў и мучениковъ нема смутногого. Най ся смутить тотъ, котрый залишивъ Іисуса

Христа, который слушать на слова ворогов, который ся токмить съ Іисусомъ. Тотъ мае причину на смутокъ, ибо тотъ, если не навернеся и дуже буде чувствовати туго горьку правду: что страшное дѣло впасти въ руки Бога.

Мы, котрѣ выдержиме съ Іисусомъ Христом, будьме веселѣ, и спѣвайме Богу небесному: „побѣдную пѣснь поюще, вопіюще, взывающе и глаголюще“.

Мы не позирайме на смутокъ и на жалостное лице ворогов Христовых, они не наши. Мы позираючи на веселѣ лица святыхъ, будьме веселѣ. Не боймeseя отъ ничего, но майме програмою въ цѣломъ нашомъ житю: „Горѣ имѣемъ сердца!“

Димитрій Поповичъ.



„Прага-Смихов“. Якась шизматицка газета, котроѣ „Адресъ: Прага-Смиховъ“ обѣцяє нашим шизматикам, что она „будетъ нести Свѣтъ Христовой истины и разъяснитъ правду!“ Читаеме в ней, что Смирений Савватій, котрого „Святѣший Патріархъ Константинопольскій“ посилае нѣкоторым Русинам за арх.-епископа — прийшов продовжати „прерванное насилиемъ въ странѣ нашей апостолское дѣло Святыхъ Кирилла и Методія“.

Ale со рак? Тоты Св. Отцы в найтѣснѣйшом соединенію, т. е. унії жили со Отцем Римским! Они признавали за видиму голову св. прав.-каѳ. Цевкви: Папу Римского. Они в особѣ Николая, тогдышнаго Папы Римского почитали намѣстника Христового! Ци сих „апостолское дѣло“ продовжаете вы и ваши „боголюбезные отцы“ a lá бохтер-Кенейз, атьоц-Рацин, мелник-

Рок 1923.

„БЛАГОВІСТИК“

Сторона 311.

Несух, ангелик-Басараб та Савченко и пр. бохтеры, кошишъ, мелники?! та „братія“, котрым Папа Римскій антихрист!? Унія „женщина что пришла на кони“ и пр.?

„Святѣшій Патріархъ Константинопольскій“ есть наслѣдником того Фотія и Керуларія, котурѣ одорвалися через свою гордость од правдивоѣ Церкви Христовоѣ и Вы Смиренный Пане, есте посланик наслѣдника роздорников. Таке яко „от сокола сокол, от удути удут“ цѣлком так правда, что и од роздорника продовженіе роздора.

Кто бы хотѣв сего сѣмя, може замовити. Адрес: „*Прага-Смихов*“.

K.


**Яку проповѣдь говоривъ батюшка? Въ Бехеровѣ** есть еденъ батюшка, именно: Вархоль, котрый родомъ есть изъ Бехерова. Якъ 18 лѣтній паробокъ отшествовавъ въ Америку, гдѣ за едно короткое время въ „майнѣ“ зароблявъ на насущный хлѣбъ, но здаєся, что то ся ему ніякъ не подобало, бо неодовга перейшовъ до едной шизматицкой семинаріи, гдѣ выслуговавъ шизматицкихъ клериковъ. Когда раз шизматицкій бискупъ въ той семинарії батюшковъ „кропивъ“, нашъ Вархоль такожъ облюкъ на себе реверенду, и спокойною совѣстю появився предъ бискупомъ для покропленія. Можеш собѣ читателю подумати, же яку совѣсть могъ мати и тогъ бискупъ, котрый докусъ пеукого человѣка поставилъ хотя и за шизматицкого батюшка. Кажеся, что передъ онома богословіе — як каже чехъ — „фукъ“ было. Сей животопись есть фактомъ, потвердять его всѣ бехеровскѣ люде. А что Вархоль вполнѣ е неуکый, досвѣдчило ся, коли на праздникъ Богоявлення таку проповѣдь держав: — слухайте:

„Вѣрнѣ мої! Днесь наша церковь великий праздникъ празднує. Но чтобы сте сей праздник достойно знали посвятити, на коротко скажу вам исторію сего праздника. Якъ разъ Адамъ на полю оравъ, прійшовъ къ нему діяволъ и просився Адама: „Прочто ты таій смутный?“ Адамъ отповѣдае: „А мой милый пріятелю, якъ бы не быти мнѣ смутному, когда моя жена Ева сѣмъ гадовъ мусить плекати“! „То ничего“! каже діяволъ. „Если ся мнѣ подпишешь на контракт, же мнѣ вѣрно будеш служити, тогда твою Еву выратую изъ сего несчастя“. Адамъ сейчасъ подпісаў контрактъ а гады Еву пустили. Тоты гады одишли на рѣку Йорданъ подъ едну скalu а тамъ были до того часу пока не прійшовъ Іисус Христос креститися. Когда Іисусъ Христосъ ступивъ на рѣку Йорданъ а увидѣвъ гадовъ, ставъ на скalu и гадамъ головы от крутивъ, а они всѣ погинули“.

Блуднѣ его вѣрники лемъ носы попущали на сю дурноту и дуже заганьбилися. Когда изъ церкви выйшли, оденього вѣрника сказавъ: „Я въ Америцѣ таку велику библію

читавъ, что аж ю 7 коней тягнуло, але въ ней таку дурноту никогда не читавъ.“

Добре батюшко! Лемъ такъ мудро и на дальше! Здаєся, что скоро лемъ пустѣ муры будуть слухати твоѣ дурницѣ!



## Священик въ найбóльшої нуждѣ.

Въ одном селѣ въ Альпах (высокѣ горы въ Швайцаріѣ) миссію держали. На казательницѣ оден монах держав проповѣдь и говоривъ о том, яку благодатну силу мае розрѣшеніе одного посвященого и законного священика.

„Як бы я на смертельной постели лежав и бы въ бы обтяженный множеством грѣхов — не поможе менѣ лиш одно. Се не лѣкарь, не богатство, не земска власть, не отець, мати, супруга або дѣти, лиш одно: священик. И може быти той священик хоть якій молодый, хоѓь як обтяженыи грѣхами, въ той минутѣ не его осoba, но его власть рахуе, tota всасть, которую достае кождый священик на основѣ словъ Іисусовыхъ: „Имже отпустите грѣхи отпустатся, имже держите держатся.“ Он, и одиноко он може въ имени Бога отпустити всѣ грѣхи чоловѣка и коло котрого конаючого священик стояв въ послѣдной минутѣ, той може быти певный, что зайде у царство небесное. Зато любезнѣ мої братя и сестры, которых я из щирого сердца люблю, не могу вам ничего лѣпшого и полезнѣйшего желати, як то, чтобы въ той послѣдной борьбѣ одного каѳолического священика мали при вашой смертельной постели. Молѣтесь зато щиро до Господа Бога, чтобы подав вам сесю найбóльшу ласку. Аминь.“

Межи людьми, котрѣ слухали сесю проповѣдь, стояв старый Яков съ своею женою. Его рѣдко было видѣти въ церкви, бо бывавъ высоко, высоко въ горахъ. Перед роками и он въ селѣ жив; но безсовѣстнѣ люди, лихварѣ — жиды цѣлкомъ выкрутили его изъ макетка, так, что неборак Яков принужден быв пойти вон изъ села и поняти службу пастуха у еднога господаря далеко у высокихъ

горах, де его не могли найти злѣ люди ни подлѣ клеветники. Они там в самотѣ так робили, як им совѣтовав монах; каждый день молилися за то, чтобы Бог не пустив их умерти в сей самотѣ без розрѣшенія священика. Так минули мѣсяцъ и мѣсяцъ. Раз лиш старый Яков похворѣвся; напала на него горячка, и хворота чтораз лѣпше запановала над старым чоловѣком.

Было то в полночи. Жона коняючого пастуха мало задрѣмала; хворый не спав. Раз лиш приступив ангел смерти до постели Якова; хворый почув его присутність и дознався, что конец его житїя уже туй е и что на слѣдуючу ноч уже лиш тѣло его буде лежати на постели. Яков почав зраховатися з своим животом; грѣхи и грѣхи, провини, беззаконности пришли ему у галку. Что буде из сего? Гнѣв, ненависть против тых, котрѣ его позбавили майна и доброго имени.

— О, Господи не остави мене так умерти, — вздыхнув умираючій — „подай менѣ еще висповѣдатися“

— „Словѣдатися? — поднесся нато сомнѣв тяжкій и темный — сповѣдатися туй на высотѣ, еще сеѣ ночи? Як ты збудиш свою жену и она злѣзе долу горами через лѣсы и пропасти в село, то триває найменше пять годин, — священикови назад знов пять годин — тогды уже давно у полудне; доти ты уже давно мертвый и студеный.

Одно голосное вздыханіе збудило дрѣмающую жену. Яков звернувся до неї:

— Запали свѣчку, дай свяченой воды, молися за одного священика.

Богобойна и вѣрна жона почала го утѣшовати, что Бог милосердий, что най ся не боить, бо Бог зажене и духовника и он висповѣдається. Потом стала на колѣнки и каже:

„Яков, я теперь стала на колѣнки и доти не стану, доки священик не прийде, и я вѣрю, что Бог небесный выслушает мою молитву. Май довѣрія, Бог небесный наш милый Отец, Пресвята Дѣва Марія наша небесна мати, она нас не оставить, тадь мы кождый день молилися, чтобы не умерли без послѣдної словѣди. Завтра до дня, як рано лиш мож, зажену хлопця за духовником в село; теперь не мож, бо мѣсяц еще не зйшов, а темнота така аж рубати мож; он пойде и за лѣкаром и за духовником. Не бойся, с Божою помочію выдержиш еще доти“.

Так молилася побожна жона аж до бѣлого дня. Сонце сходило, айбо хворый все лѣпше и лѣпше услаб. Ему и ей цѣлком чевным ся стало, что о. духовный хворого застане ще живого.

Долу в селѣ стояла одна гостиниця. В лѣтѣ повна она всякими гостями, котрѣ приходить туй в лонѣ красної природы мало одпочити од кождодневных робот и жур. В одной комнатѣ гостиници бывав и оден священик. Пришов мало меже горы, бо од напруженой работы на нерви дуже услаб быв. Кождый день откоичив в церкви села св. службу и свої священическї молитви.

Однакож якось з сим не быв доволеный, сердце его тягло еще столь доброго зробити для блага людей.

Одного днї рано якось дуже неспокойный быв; чтось тягло его вон. Взяв клебаню и палицу и рушився меже горы. Иде за одну годину, за двѣ все выше и выше. Он сам ся чудує, что он робить. Усмѣхне ся и звѣдае од себе: „Что я туй стратив, або что я туй глядаю в сей высотѣ, где и чоловѣка никде не видно? !“

Раз лиш учуе удар одной сокиры в близком. Два дроворубачи дивляться с дивованіем на него. Одеп из них здойме клебаню и звѣдае:

„Вы то ачей, кого пан отец духовный послали?“

„Что вы говорите? Як то вы думаете?“ звѣдае священик.

„Они не знаютъ нич за старого Якова?“

„За якого Якова? И кто то?“ — Дроворубачи попозерають на себе и кажуть:

„Пане, ци так, что вы священик?“

„Айно, но я еще все не разумѣю, что вы з мною хотите?“

„Старий пастух Яков там горѣ в колибѣ умирае; хлопець пошов долу в село за священиком, айбо доки священик прииде, поздно буде. Жона Якова постоянно молить ся, чтобы Бог послав до умерающего одного священника. А от! Вы туй есте!“

„Но та теперь уже разумѣю, что тягло мене горѣ, все выше и выше, молитва той бѣдної жоны.

И в слѣдуючої минутѣ священик одпрощався од людей и пиловав до бѣдної хаты умирающего Якова. Як приближає ся, чує голосну молитву жоны. Священик сильно заклонкав на дверях.

„Где е хворый?“

Удну жона разпозерала ся с дивованіем. Можливо се? Бог выслушав мою молитву и послав священика?

„Яков, Яков, туй е, туй е. Слава Тобѣ Боже, священик туй!“

„Туй е“ — каже и священик тронутый до слез и приступить до постели умирающего.

Жона на се оставила комнату и священик с хворым почав говорити. Что они там меж собою говорило, то окрем них лише сам Бог небесный знае...

Умирующий помирив ся з Богом, получив розрѣшеніе од священика, а духовник с великою душевною радостю в сердцѣ оставил бѣду хату пастуха. Не ишов и за десять минут долу горою, коли оден рубач догонив его и заявиив, что старий Яков правѣ теперъ — умер.

Другого дня раненько одправив священик службу Божу за усопшого. Як выступив из церкви, вже там стояли четыри женщины в горных убрањах: вдовиця Якова, еї сестра и двѣ

взрослѣ дѣвки усопшого. З горячими слезами даковали ему, что вчера здѣлав. А священник не мог иначе казати, лишь указовати на безконечну любов и милосердіе Всевышнього Бога, в руках которого он лишь чудесным средством быв. (б)

## Епископска подорожъ Преосвященого Епископа мукачевскаго Антонія Паппа.

Антоній Паппъ, епископъ мукачевскій отступивше отъ звычайовъ предковъ своихъ многоразъ посѣтивъ своихъ гр. кат. вѣрниковъ. Сякъ здѣлавъ и 13. октября, коли рушився изъ Ужгороду до Тисашашвару, чтобы посвятитъ нововыбудовану прекрасну церковь. Съ епископомъ ишли и д-ръ Симеон Сабо в каноникъ и Александръ Стойка, секретарь. Вѣсть епископскоѣ подорожи скоро розойшлася, такъ, что вже и на дорозѣ щиро привитали его. Коли поѣздъ ставъ въ Береговѣ, в имени угочанскаго духовенства и вѣрниковъ сердечно и со дѣтиною любовию витав преосв. епископа о. Евменій Сабо, угочанскій архидіакон, великосевлужскій пасторъ. По сему продовжали подорожъ. Не за довго ставъ поѣздъ на послѣдній стаціи дороги въ Фанчиковѣ, где торжественно чекали епископа всѣ окружнѣ духовники и вѣрники подъ проводомъ о. Василія Дрогобецкого, кто съ прекрасною бесѣдою выявивъ любовь и радость всѣхъ тамъ присутныхъ. Епископъ по сему меже великою масою гр. и рим. каѳ. вѣрниковъ зайдовъ до села Фанчикова, где посѣтивъ на самъ передъ грек. каѳ. церковь. Въ дверяхъ церкви красными, одушевленными словами привитавъ его преосвящество о. Володимир Стрипскій, тамошній гр. каѳ. духовникъ. Туй епископъ одкончивъ коротку молитву и пошовъ дале, чтобы посѣтивъ церковь и нашихъ латинскихъ кат. братей, где о. Компас витавъ Епископа и выраживъ сочувствіе и любовь вѣрниковъ лат. обряда ко Его преосвященству.

Епископъ лишивше церковь рушився прямо до Тисашашвару. Ледвы выйшовъ изъ Фанчикова, тамъ чекала его велика процесія тисашашварскихъ вѣрниковъ, котрѣ изъ щирого сердца спѣваючи св. пѣсни провадили своего любимаго Владыку до себѣ. Приемна одушевленна мелодія далеко звучала и разносила голосъ радости проповѣдуючи повсюду, что туй великое торжественное дѣло ся дѣле... Подъ Шашваромъ были устроенѣ торжественнѣ привитаючѣ ворота, где въ имени шашварскової громады подстароста Иванъ Житак радостно привитавъ епископа.

Посему продолжавъ Преосвященный дорогу. Коли дойшовъ до староѣ церкви, где велика толпа народа чекала его, изъ ряду школьнхъ дѣтей выступила мала школьнрка, учениця II. кл. елем. школы Марія Яцковичъ, и своими невинными словами привитала „доброго пастыря“.

Межу прочими сказала, что: „и мы якъ дѣти знаемъ, что многъ злъ люде суть противъ нашоѣ вѣры, но мы знаемъ, что наша вѣра е истинна Христова вѣра, котру держали нашъ прадѣды, дѣды и отцы, въ которой и мы хочеме жити и умерти“. Епископ з слезаными очима слухавъ малу дѣвчину, котру на чолѣ подѣльзовавъ преосвященный Епископ, а другъ дѣти и окреме благословивъ подобно къ своему божественному Учителю. По сему зайшовъ епископъ въ стару церковь, котра подобна къ старымъ катакомбамъ и такое вражѣння мала на человѣка, якбы въ давнихъ христіянскихъ часахъ живъ.... Туй преосвященный откончивъ малу молитву, при чмъ сердечно привитавъ своихъ любимыхъ вѣрниковъ и давъ свое отцевское благословеніе.

14-го октября, на Покровъ Прес. Богородицы въ 9 часовъ почалося великое торжество посвященя новоѣ церкви съ великою ассистенцію окружного духовенства. Тисошашварскѣ вѣрники одѣ радости съ слезами наполненными очами позирали на своего любимого пастыря, котрый святивъ имъ повну нову церковь, котра непрестанно буде проповѣдати Христолюбіе, добру душу, и жертвуючу охоту ревныхъ, благочестивыхъ тисошашварскихъ вѣрниковъ....

Прекрасное и все въ памяти остающее останеся в души каждого, кто видѣвъ туто подѣю, коли изъ староѣ церкви въ торжественномъ обходѣ перенесли святѣйшое тѣло Іисуса Христа въ нову, вже посвященну церквь. Народъ колѣна приклонивше голосно плакавъ отъ великоѣ радости. По перенесеню преосв. епископъ въ церкви подержавъ свою святочну бесѣду, въ которой съ апостольскимъ одушевленіемъ толковавъ значїння дня и напоминавъ ихъ на крѣпку вѣру. Внѣ церкви говоривъ о. Евменій Сабовъ, архид. угочанскій.

По сему почалася торжественна архиерейска літургія, въ которой участвовали о. Евм. Сабов, о. В. Дрогобецкій и Иванъ Азарій. Сеся літургія совсѣмъ такъ ишла, якъ въ ужгородской катедральной церкви. Подъ літургією съ великою побожностю позирали вѣрники на причащеніе апостольскихъ часовъ, коли само такъ — якъ тогда — Владыка кожному сповслужачому на руку положивъ св. тѣло Господа нашего Іисуса Христа. На торж. літургіи и изъ меже вѣрниковъ приступили многъ къ св. Тайнамъ, которыхъ самъ преосвящ. владыка причастивъ. Красоту богослуженя убогло еще и то, что подъ нею тисошашварска гармонія

спѣвала подъ веденіемъ упр. нар. школы Михаила Ленчура.

По сему слѣдовала вечерня, по которой бывъ торжественный обходъ подъ проводомъ его преосвященства, въ которомъ участвовало больше якъ 7000 вѣрниковъ, между которыми были и изъ шизматицкихъ сель... Видавъ совѣсть пригнала ихъ ко жерелу истинної вѣры... Давъ бы Всемогущій, чтобы чимъ скорше вернули до истинної вѣры тоты нашъ заблудшъ братя. По обходѣ Преосвященый давъ папское благословеніе и тѣ вѣрники, котрѣ сповнили условія получили повный отпустъ.

По обѣдѣ Преосвященный принимавъ депутаціи села Шашвара, и окружнхъ сѣлъ, потому депутацію окружного учительства подъ веденіемъ шк. инспектора Ивана Мигалки.

Послѣ обѣда посѣтивъ Преосвященнаго Владыку Ивана Микулку, гр. кат. учителя, вдову и матерь бывшаго свящ. Корнилія Киша, котра около 100 рочна бабуся, выявила, что вже ид V-му епископу має щастя. Бывѣ Владыка и у упр. держ. школы Михаила Ленчура. Учительство посѣтивъ Преосвященный въ гр. кат. учителя, где они задерживались съ шк. инсп. Иваномъ Мигалкомъ.

Другого дня передъ обѣдомъ съ красною памяткою вернувшись ся Преосвященный до дому.

Радость мавъ онъ, ибо могъ видѣти своихъ истинно щирыхъ, добрыхъ, православно-каѳолическихъ вѣрниковъ — но радость мали и вѣрники и тамошній священник о. Корнелій Елеш, которыхъ сполупраця достигла сей красный успѣхъ.

Велику радость має о. Елеш, кто и въ сихъ бѣдныхъ материальнихъ односинахъ выбудовавъ съ своими вѣрниками таку церковь, котра все проповѣдати буде ихъ щиростъ къ Христу. Се указуе, якъ працювати и працує о. Елешъ въ виноградѣ Бога вышняго. Всемогущій заплатить всѣмъ ихъ труды, ибо „Богъ благословить люблящихъ благолѣніе дому Его“.

Димитрій Кумятскій.

## Верховино, свѣтку ты наш...

Написав: Димитрій Кумятскій.

Многораз быв я на марамороцкой Верховинѣ. Се е луже красна околиця. Справдѣ наслаждае человѣка своими прекрасными, лѣсами покрытыми горами, в которых с великою скоростію втѣкаютъ дале малѣ горнѣ поточки...

Не давно опять требало ми пойти до одною села на Верховинѣ. Вже на передъ сильно билося мое сердце од радости, что видѣти буду знов мою милу Верховину...

Коли дойшов ем до першого села, коло одного красного будинка каже менѣ мой чоловѣк: Се е школа пане!

А! Красна школа. А дѣточки ци ходять порядочно до школы? звѣдаю я од моего чоловѣка, котрому имя Мигаль а в селѣ є куратором.

— Ходять помали! отвѣчає менѣ.

И само в той минутѣ завзвучить голос малых школяріев:

„Верховино! Свѣтку ты наш  
Гей як у тебе так мило  
Як ігри вод пливе тут час  
Свободно, сумно, весело...“

— Як красно спѣвають сеє дѣточки, любо их слухати, Мигалю!

— Та то уже правда. Видите пане, давно то не было так. Я ледви научився дачто там меже горами. И то что знаю, нашему старому пану дякую, бо он научив мене на вшивко. Бог бы дав ему царство, — каже мой Мигаль, под чим вийдуть слезы из его очей.

И сяк идеме мы дале. Маїв коники бѣжать и скоро догониме одного чоловѣка. Кажу я Мигалеви: Брате Мигалю! Возьмѣм сего чоловѣка на воз!

— Я негадаю! возьмѣм, каже куратор и с сим стане.

— Сѣдайте прошу! — кажу я ему.

— Дуже дякую, пойду я и пѣший, отвѣчає он, но и не позирає на нас.

— Пойте, пойте! — кличу я его оиять.

— Я не иду! Я с сякими учеными драбѣжниками не хожу, я худобный, не иду, туй буде ити дораз наш „пан“, та сяду ид нему.

— Добрѣ! Будьте здоровѣ! Слава Іисусу Христу!

Мы идеме дале... лішивше чоловѣка. Раз лише учуєме голос одної кочї, пообзираємесь: Один „пан“. Кочія с великими коньми попередить нас. Кто е в ней? Один „пан“ довголосатый батюшка и наш чоловѣк, котрый лиш с „своим“ „паном“ хотїв сидѣти.

— Ци видяť? — Там пошов! замѣчає мой чоловѣк.

— Айно. Вижу! Най иде! Пойде он помали и в глупоту и в темноту.

— Но, та чому кажуть есе?

Та якбым не казав, коли я знаю, што тот чоловѣк вѣрує тому довголосатому, бородатому „пану священнику“. Та який то священник? Где ся учив? Та вы то думаете, что тое можливо научитися коло коней, або коло дров в лѣсу поповати? Тадь священник веде народ в всем. Он е просвѣтителем его и в свѣтских дѣлах. Як буде вести народ один глупак, котрый и имя ледви знає под-

Рок 1923.

„БЛАГОВІСТНИК“

Сторона 319.

писати. Та ци може слѣпый писти успѣшно слѣпого? Оба впадуть в яму.

— Та сесе правда! Айбо я уже казав сесе одному батюшкови, котрый из Уйбаръони простий чоловѣк, тай одному „іеромонаху“, котрый нерод сим кочѣшом быв у одного мараморошскаго уніатскаго поши.

— А они вам что казали?

— Та того, что тоты науки не нужно кончити. Тоты лиш фишкарощам и профессорам, та другим свѣтским драбѣжникам нужнѣ, но не попам. Попови доста, если знає служити одправу.

— Так як знає на пр. спокїдати, если не знає науку нравственности, або пастырськое богословіе. Тадь там законы суть, котрѣ ему так треба знати, як одному судіови, ибо и он суд держить над грѣшним чоловѣком.

— И инше казав батюшка! Коли я его звѣдав, та дебы не треба науки, коли теперь цѣлый свѣтъ ученый. И коли я то казав, что я бым никогда не пошов на службу сякого глупака, батюшка то казав: Видиш Мигалю! *И Христос не кончив гимназіѣ, а ни апостолы а пріото як успішино проповѣдали слово Божіє.*

А вы что казали на се?

— Нич! Бо се правда! Тадь неходили до гимназії!

— Ой, ой Мигалю! Та тот кочѣш себе сравняе с Христом, та апостолами? — Ци знаете что я вам на се скажу. *Христу и апостолам не тредало ходити до гимназії, ибо Христос быв Бог, а не лише чоловѣк, а на апостолов зышов Дух Святый в огненныхъ языкахъ, который силою своего черезвычайно, чудесно отворив имъ разумъ и научивъ ихъ на всѧ. Но видавъ вы то не думаете, что если простакъ неученый Рацинъ, або дроворубач Кабалюкъ засвищѣ у Ізѣ, что тогда Богъ небесный наразъ и зашиле Духа своего Святого, в огненныхъ языкахъ, чтобы просвѣтивъ кочишовъ и дрово-рубачовъ, обѣ мали силы, одвоюзовати людей од Бога, и од его истинногъ вѣры.* А потому вы то думаете, что всѣ батюшки неукѣ? — Тут айно, но теперь уже заслали трохъ до Карловцѣ учиться. Чому? Если они то держать, что они суть наслѣдники Ісуса, та на что идуть ся учити.

— Та там не лише оторавы кончити учать?

— Правда, что нѣтъ! Учаться тамъ, много, еще и латинский языкъ, яким папышѣ служать. Знаете? Латинский!

— Йой Боже! Та ци се правда?

— Я вам кажу. Можете дозвѣдатися.

— Но та пане, я вижу, что то лиш между нашимъ глупымъ народомъ можуть быти такѣ за „іеромонаховъ“, за „поповъ“,

котръ перед пару тыжнями еще гной метали из хлѣва. Як ся не боять Бога, взяти в руки св. чашу и не ганьбляться взяти ризы. *А еще большое чудо е то, что люде не выбуть из церкви сяких „отцов.“*

— Но пане! Я вам упѡвъм чтось. И я думав на съиопы и на сю нову вѣру, и думав ем, что и я стану меже нѣ. Айбо на мою душу, не иду я в таку церков, где еще и кочѣшъ, свинаръ, та „гусаръ“ (гуси попасують) могутъ быти попами. То не церковнѣ люде, но бунтовщики и уничтожителѣ нашего народа.

Ледвы докончив Мигаль свою бесѣду, сталисьме коло нотарського уряду, я злѣз, выплатив Мигаля, просячи его, вай ся держить крѣпко свого. Он одклонився од мене: Слава Іисусу Христу, и под чим я ему одповѣв: Слава и на вѣки и рушився до хижѣ, из далеку опять чув ем голос — спѣву школярев:

Подкарпатскіи русины,  
Оставсте глубокій сон!

## Спомини загребскѣ.

Христіянскій свѣтъ — Церковь Христова, стояча на скалѣ гранитовой выдержала вже близько дватысячълѣтных громовъ-ударовъ отъ вороговъ Церкви Христовой — але та Церковь стоитъ и яснѣ въ повной славѣ и силѣ, ибо скала на якой е поставлена Церковь одинока-одна, фундаментъ та-кій, „якій ани враги пекельнѣ не удолѣютъ“; а той сильный фундаментъ, та скала е престоль римскій, где тронуе видима голова церкви, наслѣдникъ Петра Апостола, который має въ рукахъ одно оружіе — не бомбы, не злобы, не мечи але — Евхаристію.

„Евхаристія!“ ди може христіянинъ высказати чогось высшого, красшого на семъ свѣтѣ? Нѣть! Бо сей залогъ, якій намъ оставилъ Онъ — умершій на хрестѣ въ мукахъ за насъ — сей залогъ звязавъ тысячей „не забыти на Него!“ и осолодивъ, укрѣшивъ, вѣрючимъ житє до нынѣшнього дня и безконечно, на вѣки.

А же Евхаристія має той силы и днесъ, то свѣдчать о томъ наши церкви по цѣломъ свѣтѣ. Где ся погляне, одъ малого села до найбільшого города на славу Бога выставленъ великъ и богатъ храмы церквѣ, а якъ залунають ихъ глубокозвучнѣ звоны, горнутъся вѣрны до нихъ. А что тамъ найдутъ? что ихъ такъ тягнє? что тамъ увидять? Больше ничего, лемъ въ рукахъ священника забліснє маленька чаша, затремлять его уста, держучи въ рукахъ найсвятѣйшу Ев-

харистію, говорить: „**Сіє єсть тѣло мое, сіл єсть кровь мої нового завѣта**“ — и погнуться колѣна тысячей, и тысячѣ узнають а вѣрутъ крѣпко и сильно, же Богъ е ту! А та вѣра, тверда вѣра, е то сила, оружіе, яку не можуть еще ани найскаженїйшіи вороги вырвати изъ сердца христіянина.

Тѣло и кровь Христа, оставше ту на престолѣ, споеное въ одно слово „Евхаристія“ уже по наказу Христа остало намъ отъ первыхъ роковъ ажъ до нынѣ и на вѣки. Чимъ дальше тымъ лѣпше одчувае христіанство силу его а теперь запановав вже окремѣшній торжественныи культи найсвятѣйшой Евхаристіи по дѣломъ свѣтѣ, де живутъ каѳолики, на то, же вѣрующи готовъ выказати и явно задокументовати свою любовь до Спасителя. Въ головнѣйшихъ мѣстахъ устроють на честь и моленіе найсвятѣйшой Евхаристіи конгрессы, где сходяться люде изъ далекого свѣта и отдаваютъ, высказують явный поклонъ найсвятѣйшимъ Дарамъ, чтобы доказати свѣту, что вѣра Христова жіе въ сердцахъ тысячей и мільйоновъ.

На такій конгресъ, якій уже два мѣсяцѣ одбывся въ столицѣ Хорватії въ Затребу, потягнули не великій гуртокъ вѣрующихъ съ третої границѣ, чтобы поклонитися и видѣти тоту силу и солідарность, яку не знає только вѣра высказати.

Конгресъ Евхаристичный въ Загребѣ бывъ еднымъ словомъ сказавши импозантный, торжественный! Тисяча и тисяча пришедшихъ на сіе торжество (около 100.000) взбудили въ чоловѣку завзятость, вдарилися въ груди, шепотячи устами: вѣрую въ единство Церкви Христовой; были тамъ тисячѣ чужихъ вселіякай народности: словиндовъ, босняковъ, хорватовъ, нашихъ русиновъ, далматовъ, крайняновъ, тырольдовъ, таліановъ, еще и мадяровъ, бѣдныхъ и богачовъ, женъ и дѣтей, священиковъ и епископовъ — а всѣ они подъ знакомъ креста припавше богобоинно, подъ чашу сохранявшу найсвятѣйшу Евхаристію чуються братами — такъ якъ то Онъ приказавъ; ту не е ворога, ту не е чужого, ту подъ хрестомъ кождый молиться своимъ языкомъ, бо Богъ е одень, Церковь е одна, Тѣло и Кровь спасла насть всѣхъ однако.

Вступивши въ церковь нашу далеко одѣ нашего родного краю, чули мы ся дома, хотѣбы десь на Маковици, або въ Марамороши были'сме у церкви. Правда, при великихъ храмахъ римского обряда майже пропаде, але все таки биткомъ набита импонує вступившому до ней, где безпрестанно кончилися обряды, выголосовалися проповѣди, при участії архипастыря, любимого епископа Діонізія Нярадія; уже въ пятницю 17-го августи почалися гуртомъ сходити вѣрники до церкви и до недѣлѣ вечера або до понедѣлка рано все однако побожностю пынула молитва, лунали спѣvy.

Примѣчаю, что кождому упало до вниманія, же на цѣломъ конгресѣ пановавъ неописаный порядокъ — не якбы войско, полиція держали тамъ порядокъ, но люде сами одѣ себе почували, же пришли на великий праздникъ; всѣ почували одну Силу, котра знае пановати душами тысячей всѣлякихъ народностей, зошлыхся подъ катедрами Загребу.

Сякъ Загребъ торжествовалъ, показавши себѣ ревнымъ и добрымъ каѳоликомъ, цѣле мѣсто, кождый домъ, украшеный дорогими телихами, квѣтъемъ, съ освѣтлеными довгими улицями, где однакъ торжествовали, куды переходили походы, процесіѣ съ найсвятѣйшою Евхаристією и не одному текли слезы изъ очей одѣ радости, видячи таку силу, туту любовь, котра притягла до сего мѣста безчисленный рядъ вѣрныхъ.

Якъ ставилая процесія на Елапичовомъ торгу, чтобы одержати благословіе — цѣле море похиленыхъ головъ счастливо ждало той моментъ, якъ въ рукахъ папского посланника появиться Евхаристія, благословячи насъ и укрѣпивши на дальшу борьбу за Христа и вѣру, и изъ устъ тремлячихъ одушевленно залунало: Свѧть, Свѧть, Свѧть, Христосъ Богъ! И мы розошлись съ довною вѣрою въ Іисуса.

Присутній.

## ЛИТЕРАТУРА

Růže Lurdská. Bratislava. č. 10.

Vychovatel. Praha. č. 10.

Věstník katechetský. Praha č. 10.

Věstník společnosti sv. Cyrilla a Metoděje. Praha. č. 3.

Наш родный край. Ч. 2.

Posol. Trnava. č. 10.

Mіссіонар. Жовква. Ч. 9.

Dorost. Veslnrk česke mlodeži. Praha. č. 2.

Наш Пріятель. Часопис для дѣтей. Ч. 10.

Нива. Ч. 8—9. Содержаніе: При вѣт. (Митрополиту Шептицкому) Ст. Ковалов: Читаня и толкованя св. Письма въ ба. Церкви. Др. Костельник: Створеня. Да что из богослужебных обрядов. Зин. Кузьма: Про что и як нам проповѣдати въ нынѣщихъ часах? Еп. Бодан: Перед ювилеем св. Йосифата. М. Чорнега: Брак однообразности въ богослуженіяхъ. Организація духовенства. Меже вѣстями приносить интересантнѣ факты о шизм. агитації въ нашої епархії. Въ гомілеоничной частинѣ помѣщено шѣсть добрыхъ проповѣдей. Въ недостатку такого органа фахового въ нашої епархії широ вру-

чаеме „Ниву“ в внимание напим о. духовникам. Предплату 20 кѣ. — прийме и Блатовѣстник.

Поступ ч. 7—8. Богатое содержаніе с додаком: Интересантнѣ оповѣданія для молодежи.

# НОВОСТИ

— Преосвященный епископ Антоний с каноником Шубою поѣхав до Праги и там притомный быв на конференціи епископов цѣлої Республики. Пряшевскій епископ також участвовав на сей спикопской конференціи.

— Смерть. О. Мирон Волкай духовник в Америцѣ упокоився. Николай Ковач богослов ужгородскої семинаріи в Севлюшѣ 27-го октября упокоився. Блаженный им покой.

— Посвященіе новых пресвитеров. Преосв. епископ 4-го новембра рукополагаетъ слѣдующих оконченых богословов: Антонія Гаврила, Адалberta Грабара а Степана Фесторія.

— Выименование. Преосвященный епископ Антоній выименовав Димитрія Поповича до частного пом. проф. ужг. пѣвцо-учит. семинаріи, нашего сповроботника до той сами семинаріи за п. профессора с постоянным характером.

— З Пряшевскої епархіи. Преосвященный епископ Діонизій выименовав за духовного управителя семинаріи о. Емануила Бигарія, бывшого бардіевского парха.

— Вѣнчаня. В ужгородской каѳедральной церкви держав 25-го октября вѣнчаня Йосиф Бок-

шай знатный рускій малярь с Маргаретою Арвай. Отправу кончили о. Ем. Бокшай отвѣчательный редактор Благовѣстника.

— На день свободы (Х. 28) так в каѳедральноѣ, як в всѣх церквах Мукачевскої епархіи отбывалися торжественнѣ богослуженія за благобыт нашего отечства.

— На територіи Україны теперь боруть ся три „церкви“: одна стара „правовѣрна“, котру большевики называютъ чорною, друга „украинска автокефальна“ т. зв. синьожовта, и третя „жива церква“ „на чолѣ с патріархом Тихоном, котру народ жовтою держковію называє. Правительство подпорує „живу церков“, бо она перепята большевицким духом и арестовало и „чорного“ и „синьожовтого“ митрополита. Коли Тихон пришов до Києва перебрати кіевскій метроп. престол, народ в церкви явно противостояв. На конци архіерейскої службы вѣрники приходяще цѣловятіи крест, плювали митрополитови в лицѣ... Тихон мусъв утѣкати из Киева.

— Царгородскій „вселенскій“ патріярх Мелетій IV. зреck ся своего достоинства и утѣк до одного монастыря на горѣ Аѳос. Он быв загорѣлым

греком и голосив хрестопосный поход против Турков; но турки побѣдили, а он мусѣв утѣкати. С ним и сами греки не были вдоволенѣ.

— Най живе паленка! В селѣ Рахов (Марм.) дозволено открыти 25 корчем. Бѣдное село и нещасный народ! Звѣдаеме: Се есть народопросвѣщеніе?

— В Италіи ухвалили закон, по которому в цѣлой державѣ розпоряджено религію учити, як повинний предмет в всѣх школах. До сего часу духовники лишь в церквях могли учити школьнѹ молодеж на религію. Дивна рѣч, что в Италіи отворяютъ школьскѣ дверѣ религіи а у нас министерія хотѣла бы заперти.

**Короткѣ вѣсти:** Из меже всѣх пѣмецких городов пай больше каѳоликов жие в Берлинѣ; число вѣрников 500000, котрѣ мають 40 церквей. — В Италіи выдаютъ новѣ почтовѣ штемпеліки, на штемпеліках буде образ Спасителя меже апостолами. — Из Палестины товпами утѣкаютъ жиды в другѣ краины. Кажуть, что меже христіянами лѣще выжиють, як меже жидами. — Папа римскій выдав буллу из нагоды 107 лѣтной канонизаціи св. Оомы из Аквину. — В Африцѣ открыли стародавнѣ катакомбы (подземнѣ гробы первых христіян) в которых находяться 15,000 христ. гробов из I. II. и III-го столѣтія. — В Виднѣ на сельских выборах выиграли христ.-соціалисты; из всѣх 164 мандатов достали 81 чим слали они наибольшою партіею Видня.

## НА ФОНД „БЛАГОВѢСТНИКА“.

В днешних тяжких часах не только священники мають проповѣдати Христову правду. Христіанска новинка Благовѣстник есть голосною трубою вѣры отцевскої; еї голос мусить учuti всѣ вѣрники и черпати отвагу на дальшу борьбу. Вѣрных осмѣляе — ворогов настращить! Кождый христіанин повинен постаратися, чтобы голос сего ревного борца не занѣмѣв. Соберайме предплатников и даруйме на фонд Благовѣстника!

Даровали: Гр. каѳ. вѣрники Терновскѣ (ж. Марм.) 25 Кч., гр. каѳ. вѣрники Вульховскѣ (ж. Марм.) 22 Кч., Павел Спишак семинарист Прашов 20 Кч.

## ЦЕРЕПИСКИ РЕДАКЦІИ.

Е. Нев. Щира подяка за труды. Предплата на 1/2 рока 6 Кч.

Паломник Статя мало позднѣйше буде помѣщена.

Довжники наши, най старажатсѧ сице до 15-го новембра заслати предплату.

РЕДАКТОР-ИЗДАТЕЛЬ:  
АВГУСТИН ВОЛОШИН.

ОТВѢЧАТЕЛЬНЫЙ РЕДАКТОР  
ЕМИЛІЯН БОЖШАЙ.